




ԱՄԵՆԱՅՆ ՀԱՅՈՅ ՀԱՅՐԱՊԵՏԻ ՑԱՎԱԿՑՈՒԹՅՈՒՆԸ
ՄԵԾԱՆՈՒՆ ԲԱՆԱՍՏԵՂԾ ԱՎԵՏԻՔ ԻՍԱՀԱԿՅԱՆԻ
ՄԱՀՎԱՆ ԱՌԹԻՎ

Ամենայն հայոց Մայր Աթոռ ս. Էջմիածնից, վերջին ողջույն և օրհնություն ամենայն հայոց բանաստեղծ Ավետիք Իսահակյանին, որ բաժնվելով մեր աշխարհից, անցնում է խաղաղ ու անվրդով կյանքի մյուս ափին:

Այս բաժանումը խոր վիշտ է թողնում բոլոր սրտերում, որ բաբախում են հայրենի երկրում և հայ սփյուռքում:

Մեր ժողովուրդը կորցնում է իր մեծ գավակին, որ ավելի քան կես դար վառ պահեց ջանք մեր ազգի ազնիվ հույզերի:

Հայ գրականությունը կորցնում է իր մեծատաղանդ Վարպետին, որ իր բովանդակ հոգին լույսի վերածած ընծա բերեց իր հարազատ ժողովրդին ու ամբողջ աշխարհին:

Կորցնում է նաև Մայր Աթոռը իր մեծ քարեկամին ու սիրեցյալ որդուն, որ մեր ս. Էջմիածնի հազարամյա քարերի խորհուրդը սրտում, աղոթում էր վերածնված մեր հայրենիքի կյանքի, արևի ու խաղաղ, ազատ վերելքի համար:

Վարպետը մեռավ, Վարպետը կապրի և պիտի ապրի հայ ժողովրդի հոգում ու կյանքում, բաշխվելով ամբողջապես մեզ բոլորիս և հետագա բոլոր սերունդներին: Եվ նա կմնա միշտ մեզ հետ, կլինի միշտ մերը՝ իբրև ներշնչման աղբյուր, իբրև լուսաշող փայրոս:

Տիրոջ ողորմությամբ հանգիստ իր հոգվույն, խաղաղություն և լույս, այժմ և հավիտյան:

ՎԱԶԳԵՆ Ա.

ԿԱԹՈՂԻԿՈՍ ԱՄԵՆԱՅՆ ՀԱՅՈՅ

Ս. Էջմիածին

(«Էջմիածին» ամսագիր, 1957 թ., նո. Ժ, էջ 68)